

# Eseng kajeno, Sekhametsi!

E ngotswe ke Mabel Mnensa

Ditshwantsho ka Chantelle le Burgen Thorne


Sekhametsi o utlwa hantle hore kajeno e tllilo ba letsatsi le kgethehileng.

O batlana le diteki le dikausu tsa hae ka tlasa bethe ya hae. O sheba borikgwe bo bokgutshwane ka mora lemati. “Tshibollo ho ya ka hodima moaho wa rona e ka ba ntho e monate haholo. Mohlomong nka fumana matlotlo moo.”

“Tjhe. Eseng kajeno, Sekhametsi,” ho rialo Mme “O keke wa itshilafatsa. Tsa mo itlhatswa,” Ntate a eketsa.

Sekhametsi o topola molomo. “Hoja Rakgadi Sindi a ne a le mona o ne a tla ya ka hodima moaho le nna mme a mpontshe matlotlo le kgauta.”





Kamora ho ja dijo tsa hoseng, Sekhametsi o bona metswalle ya hae e bapala ka ntle tlase. Mohlomong e tla nne e be letsatsi le kgethehileng he.

O sheba Mme le Ntate mme o a bososela. “Ke letsatsi le letle haholo ho ya bapala *mgusha*. Nka nna ka ya bapala?”

Mme o sisinya hlooho. Tjhe. Eseng kajeno, Sekhametsi. Ha o a lokela ho ba ditshila. Dula pela ka mona.”

Sekhametsi o topola molomo. “Hoja Rakgadi Sindi o ne a le teng o ne a tla ntumella ho ya bapala le metswalle ya ka. Ke ne ke nahana hore letsatsi la kajeno e tla ba le kgethehileng.”

Monko wa dijo tse monate wa lebisa Sekhametsi ka kitjhineng. Ho na le poleiti ya makwenya a tjhesang hodima tafole. Dihwete, lethisi le ditamati di ntse di kgabelwa ho etsa salate. Na hoo ho ka ontong ke kuku? Mohlomong kajeno e ntse e tla ba letsatsi le kgethehileng he! O kena a nanya mme o leka ho latswa lekwenya le le leng feela.

Mme o mo jabela letsohong, “Tjhe. Eseng kajeno, Sekhametsi. Ke a behetse ha morao.”



Sekhametsi o phutha matsoho. “Hoja Rakgadi Sindi o ne a le teng o ne a tla ntumella ho latswa ntho e nngwe le e nngwe, esitana le hlama.”

Sekhametsi o dutse ka kobo ya hae, o topotse molomo. “Kajeno ha se letsatsi le kgethehileng hohang. Ke letsatsi le bodutu.”

Ntate o tlosa kobo eo hloohong ya hae, “Tjhe. Eseng kajeno, Sekhametsi. Tloo kwano, ke batla hore o ye le rona seteisheneng.”

Sekhametsi o ema a ntse a kgenne. “Hoja Rakgadi Sindi o ne a le teng o ne a tla ntumella hore ke dule dikobong mme a mphetele pale, kapa tse pedi”



Mme, Ntate le Sekhametsi ba tsamaya ho ya Park Station. Sekhametsi o topotse molomo mme kahoo ha a bone mookodi o hole mane kapa ho utlwa sehlopha se binang pina eo a e ratang hukung mane. A ka mpa a itulela hae, ka hodima moaho kapa ho bapala le metswalle ya hae.

“Lena ke letsatsi le lebe ka ho fetisisa,” o rialo.

“Tjhe. Eseng kajeno, Sekhametsi. Sheba!” Mme le Ntate ba rialo ka bobedi. “Bona ke mang!”

Sekhametsi a phahamisa mahlo mme a bona motho ya kgethehileng haholo a etla ho bona.

“Rakgadi Sindi!” o a hoeletsa, o mathela ho rakgadi wa hae eo a mo ratang ka ho fetisisa.

Rakgadi Sindi o phamola Sekhametsi ka hara diphaka tsa hae. “Ke se ke tatetse hore ke ye le wena ka hodima moaho ho ya palama meokodi. Kapa re ilo tlola kgati. Kapa mohlomong re tla ja makwenya mme re phete dipale?”

“E! Letsatsi le monate la tswalo, Rakgadi Sindi! Ke tsebile hore letsatsi la kajeno le kgethehile.”

“Tjhe. Eseng kajeno, Sekhametsi.”

Sekhametsi o phutha matsoho mme o sheba batswadi ba hae hampe.

“Letsatsi la kajeno ke letsatsi le kgethehileng ho feta a mang kaofela!” Mme le Ntate ba tsheha.



# Eseng kajeno, Sekhametsi!

E ngotswe ke Mabel Mnensa • Ditshwantsho ka Chantelle le Burgen Thorne

## Mehopolo eo le ka buang ka yona

Ke eng se neng se tla etsa hore letsatsi e be le "kgethehileng ho feta a mang kaofela" bakeng sa hao?

Ke dinako dife tse thabisang kapa maemo ao o bileng le wona haufinyane. Ke eng se entseng hore dinako tseo e be tse kgethehileng?



## Setshwantsho

Taka setshwantsho sa hao le "motho ya kgethehileng haholo" bophelong ba hao.



## Ho bala

Eba lefokisi la mantswa! Shebisisa pale. Na o ka fumana:

- ★ dintho tse supileng tseo o ka di jang
- ★ ntho eo o ka nnang wa e bona ka letsatsi leo pula e nang
- ★ lebitso la papadi




## Ho ngola

Ngolla motho ya kgethehileng ka ho fetisisa bophelong ba hao molaetsa o mo iwetsa hore ke hobaneng a kgethehileng haholo ha kaalo ho wena.



## Mosebetsi wa matsoho

Etsa foreime bakeng sa setshwantsho seo o se takileng. Kgomaretsa setshwantsho sa hao pamring ya khateboto e kgolo ho feta setshwantsho. Taka mola ho potoloha mothati wa setshwantsho. Kgabisa foreime.



## Tshebetso

Bapala dintho tsohle tseo Sekhametsi a nahanang a di etsa le rakgadi wa hae ha wena kapa motho e mong a bala dikarolo tseo tsa pale ka lentse le phahameng.

